

權載之文集

二

權載之文集卷第二十七

唐權德輿字載之

墓誌

唐故相國右庶子崔公夫人河東縣君柳氏

墓誌銘

并序

貞元十有一年歲在乙亥春三月丁丑故相國安平公夫人河東縣君考終命于京師安仁里蓋春秋若干其孤曰懿伯號侍韓祗以十月庚午返柩于河南某原安公之舊封禮也夫人姓柳氏代爲河汾右族齊周之際中書孝公虬司會景公慶以匪躬厚行爲北朝名臣孝公生止戈後周洛州刺史洛州孫皇海州長史憬生皇伊陽縣丞璿夫人之祖禰也夫人憑積厚之祉體柔嘉之姿既笄歸于安平公公始以處士納采至于佩相印三十年間內則彰聞嘗以命婦宜家疏封于本郡又以中官恤禮爲位於內朝齊明以助祭慈惠以厚下輪翟五采副笄六珈幽閒必聞於法度優汰不萌于心術盛德發于身而被于族姻不可詳已始用和樂安于隱約終以淑均居於顯尊大君子之家肥道光其助宏矣既娶未亡之痛深惟出世之法受微言于順禪師以蓮花普門爲方寸津筏宜其永錫眉壽而爲大家今則已矣

予壹不知夫命也懿伯爲左千牛備身純孝好學居喪得禮長女適安農楊宏微纔半歲有共美栢舟之誓明識令行倫于古人幼女以祔禰來歸共承宗事故于夫人之道得周知之懿伯以陵谷之不可以不識哀請論譔大凡以乾元元年合姓貞元二年受封安平公薨八年而夫人捐歸其銘曰

於穆夫人徽柔淑溫儀于德門蹈履內則六姻是式藹然慈人魚軒煌煌佩玉鏘鏘威儀申申居貧且樂處貴愈約其道可尊不享大年奄歸下泉孰司陶鈞哀此孝嗣煢然無恃訴于蒼旻東周故園宰樹鮮原裳帷翻翻謝于幽窆刻是貞石厥聲長存

唐故義武軍節度支度營田易定觀察處置等

使檢校司空同中書門下平章事贈太傅上

谷郡王張公鄴國夫人谷氏墓誌銘

并序

夫人姓谷氏魏郡昌樂人其先漢大司農永之後故義武軍節度檢校司空同中書門下平章事贈太傅上谷郡王張公之夫人也四代祖郝律貞觀中仕至諫議大夫宏文館學士曾祖補衮左羽林軍長史祖倚相秘書省正字佑蘭錡以嚴禁旅詳魯魚以考秘文猶未充其才則延耀于後考崇義天寶末以雄畧氣敢從漁陽之

師每建奇功亟推北狄歷左武衛將軍左金吾衛大將軍累兼太僕殿中追贈特進懿是勲慶叢于夫人天資才明動合圖史早以矜摯之誠宜于鐘鼎之門百兩以納采三月而助祭克洽中饋至于上公其于佐以純誠規以策畫超冠命婦之道叶贊守臣之勞者有焉建中元年疏賦于魏郡三年徙封于鄧國徽音法度列在命書貞元七年太傅薨于理所嗣子今義武軍節度易定等州觀察處置等使工部尚書易州刺史兼御史大夫延德郡王茂昭能業其勤載延其賞克家稟訓宣力撫封六官分職八命作牧虞潭榮養用厚人倫魯侯燕喜方期壽考伯仲有裕稱于北河曳裾于邸第者三持憲於牙門者一貞元十一年以幼子銀青光祿大夫光祿少卿駙馬都尉茂宗既承築館之恩來俟執筭之慶方榮著代俄痛終堂以十二年二月丁卯寢疾歿于萬年縣安仁里享年四十九遺表以車服器用上獻王人就第申吊賜絹三百疋布一百端此又恩禮之有加尚書以移孝在公遠竭誠信光祿以銜恤茹痛躬奉裳帷以其年冬十月甲戌得吉卜于京師少陵原不耐于太傅行古之道也生極井賦沒有寵賻恩備終始以榮以哀申命司言之臣採其淑行用琢琬琰銘于墓門銘曰

鵲巢之德夫人之職輔于上谷啟是鄧國淑慎溫惠徽柔令色克大閨門施于燕翼萬鍾雖及九原俄卽賦命有涯孝思罔極

唐故衛國夫人墓誌銘 并序

夫人姓李氏趙郡人前相國司空今戶部尚書燕國于公之室也曾祖仲思皇監田縣尉祖琳河南叅軍考復司農丞三葉名器卑而婚親族類爲山東冠甲外曾王父斐丞相文獻公左右元宗爲時才臣外王父吏部郎中贈刑部尚書綜以文行清名著於舅族多賢與軒冕俱大中外積厚而生夫人興元元年燕公以南官郎晃而親迎其後歷二千石九卿觀風貞師輝耀宏大三公相印六職地征勤勞輔佐淑慎和樂鵲巢之均一樛木之逮下采蘋之能循法度孟斯之子孫衆多寔備有焉晉令公侯夫人銀印青綬佩水蒼玉貞元二年夫人以外命婦封河南縣君十九年以元侯內子進衛國夫人廣大專靜尚柔含德不言而徽音自遠不耀而儀型可象鍾郝之禮法爲而不有姬嬴之地望有而不恃子六姻之中薰然以仁煦然如春推心以及物各得其所欲故燕公琴瑟友之鐘鼓樂之克成婦順以贊家道元和十年冬十二月甲辰寢疾薨于安仁里第享年若干不

求醫禱以順性命雖知道之君子所難能焉明年春二月庚申耐先姑之塋于興平縣之某原禮也嗣子前太子左贊善大夫正秘書丞方某官季友某官某等永惟免於水火以至冠婚列在朝序率由慈蔭自帷堂至於遺奠哀敬有加燕公以德輿於外族爲表甥于中臺爲同列嗒然之痛俾誌斯文公又命方等泣狀往行始終詳實故如其論次繫之以銘銘曰

燕公之室宏是內則衛國攸宜淑明柔克環佩鏘然蒸嘗吉錫家肥族睦二十二年如賓之敬循道之性不慮不圖奄忽大病茂陵蒼蒼宰樹陰堂幽宅于茲兮德輝不忘

前京兆府咸陽縣丞權公故夫人清河張氏墓

誌銘并序

夫人姓張氏南陽人曾祖鉉皇正議大夫常州刺史祖重輝皇朝議大夫衡州刺史贈太常卿考伯禽皇銀青光祿大夫將作少監兼通事舍人奕代以大夫二千石班宣教化而先公贊謁在帝左右兄憑又以衡尉少卿簡王傳世其官故表儀風訓家法延耀夫人承是吉祿生而懿美大厯十二年旣笄歸于天水權公公時爲潯翊縣尉其後簿登封贊咸陽徧翔於周秦間皆用功次

得調滿歲食貧則嘻嘻於衡車之下族屬和而家事理抑夫人是類資性溫重閨門整峻每中外六姻有嘉會喪禮必羞必赴周旋法度女士憲焉而不得鳴加佩王宏大中饋命也貞元十八年夏四月暴嬰疾瘳終于京師新昌里春秋若干秋七月窆于某縣某原從吉筮也支子某等充窮技泣捧是圖石云以不可不識命從祖兄子銘之其詞曰

在漢七郭族之盛兮常山衡陽休有慶兮父兄仍代贊名命令展彼夫人來合姓兮徽柔靜專家道正兮生也有涯斯大病兮芻靈廣柳掩泉徑兮刻此貞珉彭淑令兮

唐故朝議大夫洋州刺史王君夫人博陵縣君

崔氏耐葬墓誌銘并序

夫人姓崔氏博陵安平人皇鳳閣侍郎平章事博陵郡王元暉之曾孫禮部侍郎璩之孫侍御史賁之息女洋州刺史瑯琊王君澄之嘉耦崔氏自漢濟北長岑代爲文宗王氏自晉睢陵口邱繼生元臣二族之茂范蔚宗沈休文推本言之矣重以母后中宗之際石泉博陵二先正有經綸命代之材推戴格天之業延耀濟美爲祥爲祉爲君子爲士女合姓好述與他族不侔夫人未笄累失恃怙旁無弟兄血泣襄事奉二尊裳帷間闕道途

自鍾陵抵洛邑哀敬與禮三者無違神佑純孝爲宗姻所歎某年從父兄縱盛選卿才故王君納采焉王君以才器政事連辟公府歷御史司直爲河南紀綱據改陽翟令入爲尚書屯田郎出刺洋州柔嘉左右叶是休德

初洋州同氣八人各位焯于當時冢婦介婦必華宗淑婦夫人贊宗事供先祀鼓瑟誦詩安操嫺雅奉上以誠羣居用和外言內言不越于閭朝服祭服必成于手洋州捐館二十年而夫人歿於櫟陽之別墅時貞元十九年秋七月某甲子蓋年五十一初洋州娶榮陽鄭氏生子曰迨而天夫人以繼室生子三人曰迺曰遠曰邁母儀均養皆爲良士迨仕至藍田尉迺修詞與計偕遠邁咸以門資分佐環列哀號罔極泣問龜策以二十年冬十月某甲子祔于洋州之舊封先是洋州猶子興平尉源長受夫人之理命曰吾與爾二門積德來代銘表必咨時文先舅之碑吏部郎趙郡李公實爲之先君之誌從翁太傅文貞公實爲之且以德與于夫人有通世之舊猥求論譔泣狀遺懿實而不華是用采獲以銘內則銘曰

安平臨沂右族蕃滋仁賢是儀好合嚶嚶乃封故地象服斯賁諒無攸遂亦勸以義婦順彰聞母儀可尊肅肅

閨門四男晨昏于嗟風樹奄闕泉路魯人之祔皇辟之墓鏤茲淑聲永識冥冥

唐故湖州武康縣丞許君夫人京兆韋氏墓誌

銘并序

夫人韋氏京兆杜陵人楚傳漢相之後分封競爽以至周鄭襄公孝寬爲宗門龜龍曾祖某某官祖某某官父楚器皇太子官門郎其外族隴西李氏梁武昭王元盛後魏司空文穆公冲隋絳郡公禮成之世德與之從母弟也中外華閭乃生淑詰幼失恃怙先太君保而養之猶女子子焉旣笄歸于某郡許授授循理喻義調常州義興尉湖州武康丞滿歲畋田廬於雪溪之上忘懷進取夫人贊家道以供先祀誠伯宗而體典缺許君之動靜無悔抑有助焉所從之祿甚薄不及偕老徙宅教子宜家佐饒閨門之理有同嚴君才識所及過人遠甚雖內外之言不越于閭而人事物理皆能折中焉凡結禱二十五歲而稱未亡人又十五歲而不舉火時元和二年正月某甲子春秋五十九其子士儉謹敬屬詩書未與計偕者不忍違養故也泣訪舊蔡得十月某甲子吉權祔于皇辟之封惟夫人有姿操徽範不得被魚軒翟茀之飾獨振內則而傳母儀孝子冢婦居喪率禮禮無

連而哀有餘姻黨稱焉嗚呼孩提相長實均同氣今視士儉猶吾之出焉士儉誠哀詞理命請刻圖石屑涕直書寄茲沉痛銘曰

士之贊行未必豐祿有美夫人不登象服從夫也有德有儀訓子也恩斯勤斯勸以義今導之慈養未及今命奪之服在總兮心若芥刻琬琰兮流涕淚

唐故潤州昭代寺比丘尼元應墓誌銘并序

維貞元六年冬十一月戊子比邱尼元應化滅于潤州丹陽縣昭代寺享年五十四經夏十有三明日庚申寧神于縣北之某原刻石紀墓虞陵谷之變也叙其畧則勿稟公官之教早繼德門之室次有徙宅之訓終悟捨筏之宗紀其詳則俗姓盧氏世閭華峻倬於漢魏以至北齊黃門侍郎恩道卽六代祖也曾祖悌隱居不仕祖暄皇中散大夫邠王友贈秘書監父湓皇中散大夫婺州刺史惟先人叔父迭領名藩出也作民父母入也爲王卿士再世出于裴而舅族多賢繼貳六官聯居九牧中外纓冕之盛冠于士林儲是德慶宜有淑蒔初以旣笄之年歸隴西李君晉卿仕至東陽決曹掾靖恭敏直齒位皆屈其子輔贊淑賢之道盤裝組紉之事舉無違德姻黨宜之晝哭之後樓心釋氏旣厭有生之患竟從

受具之法灑濯世網揭厲元津外修尸羅中習禪惠法器方茂遠與化俱初決曹府君前夫人范陽盧氏子曰暢幼懷字育之仁夙奉詩書之訓再以經術踐甲科厯校書郎密縣尉柴毀樂樂隣于滅性孝慈相感名教多之銜恤卜兆竭其誠信附于窀穸之事率從慈芻之儀且遺令也德輿于密縣爲族外弟服儒同術里仁甚久哀託論譔謹無媿辭銘曰

柔濡清淨蓮花之性端明綢直淑女之行上無訖離下振母儀晚悟真諦空王爲師體魄者何電燄無期往而不復哀哀孝思

唐故洛陽縣尉何君夫人范陽盧氏墓誌銘并序

夫人姓盧氏范陽人曾祖仁皇相州錄事參軍祖不勤望壽州霍山縣丞父隨皇太原府祁縣丞三世冲晦皆不至大官故夫人鍾其粹美生爲嬪則旣笄之年歸廬江何君官至洛陽縣尉夫人有輔贊之美柔明之行誠順孝慈以內則爲師故得六姻之和而禮無違者乾元中何君早世夫人訓子諸孤動必以方長子士程爲蘇州嘉興尉幼子士父儒行脩明或吏或文克荷先構有女二人長適河東裴氏次適博陵崔氏皆奉母氏之

訓宜其家室非導之教之之至其及此歟以興元元年三月日考終命于嘉興年六十一士程士父等謀及龜筮以某月日權厝潤州未克返葬故也夫人即考功員外郎士幹之世母也子嘗接考功遊獲聞行寔故不敢辭二孤之請刻石以銘之辭曰

婉彼夫人淑明柔克周旋動用率由四德不享繁祉不躋壽域二連之哀哀何有極

唐故潤州丹陽縣尉李公夫人范陽盧氏墓誌

銘并序

夫人姓盧氏范陽人北齊黃門侍郎思道之五代孫也會祖悌皇高道不仕祖綱皇城門郎父侑皇太原縣尉雖仕皆數命以至淪謝而皆飾行懿文有當時之譽明德奕世誕生夫人既笄嬪于李公公爲烏程丹陽二縣尉夫人居貧守約動必由禮謙敬以睦中外吉蠲以奉蒸嘗甘穠梁服澣濯中饋式叙和樂嚶嚶有嘉聞而無攸遂一紀于茲矣嘗聞善餘慶謙受益豈前志之謬歟將有必定之數歟旣而奄忽遺疾不翌日而大漸以大歷十一年月日沒于丹陽之私第享年若干以某月日權厝于縣西之五里原從宜也生子數人早歲夭落今之存者女子三人長者生纔六霜其次差以幼矣雖禮

所未及而號不絕聲呱呱然行路之爲惜戚公以爲鼓盆傷神兩不中節而鍾情之哀可勝旣乎且虞陵谷之變乃命權氏舅德與爲之銘曰

去夏屋之梁渠兮卽孤邱之戔戔今往不可復兮沉痛如何薤露蒿里今古有哀詞

唐睦州桐廬縣丞柳君故夫人天水權氏墓誌

銘并序

夫人姓權氏天水略陽人十二代祖翼前秦僕射安邸敬公其後至周隋間有佐命功伐荷茅土者三葉以至曾王父滑州刺史匡城縣令崇本王父益州成都縣尉無待烈考許州臨潁縣令伋成都以太學進士擢第臨潁判入甲科皆以文學著名粹行純氣有以鍾下夫人生而敏異姿性端明懿行全識發於天授而和敬以事長慈惠以拊下窈窕德象動成儀度機鑒精辯而深自晦默伯仲甥侄等每有疑理滯義多所諮訪夫人不得已而後言言必中倫誠順之道自中形外外內族姻之中瞻其儀型剛戾者順不仁者化以貞元二年正月歸河東柳君爲睦州桐廬丞方謂有魚軒象服之慶享偕者宜家之壽不幸遽疾病以其年七月日終于桐廬之官舍享年若干自說悅至于屬纊九族無間言終食

新刊權載之文集卷第二十八

唐權德輿字載之

銘贊

唐故洪州開元寺石門道一禪師塔銘 并序

無違德宜乎綏履福而介眉壽備祭服以參商館而迨
阨終身莫申其道六姻安仰爲善者惑豈善慶昭報之
言妄作耶將壽夭淹速之度固有所定耶柳君泰其喪
以某月日權厝于丹陽縣某原竇氏伯姊之塋次從遣
旨也從父兄子德輿一二羣從街茹永痛書實錄于墓
石銘曰
采蘋采蘋列於詩人恭惟淑明與古爲隣嘉玉粹溫舜
英蓋葢凄風夜壑銷鑠理淪命不可問兮從古云追
琢淑聲兮用識幽墳

權載之文集卷二十七

鍾陵之西曰海昏海昏南鄙有石門山禪宗大師馬氏
塔廟之所在也門弟子以德輿嘗游大師之藩俾文言
而揭之曰三如來身以大慈爲之本六波羅蜜以般若
爲之鍵非上德宿殖者惡乎至哉大師法諱道一代居
德陽生於異表幼無兒戲疑如山立湛若川淳舌廣長
以覆準足文理而成字全德法器自天授之嘗以爲九
流六學不足經慮局然理世之具豈資出世之方唯度
門正覺爲上智宅心之域耳初落髮於資中進具於巴
西後聞衡岳有讓禪師者傳教於曹溪六祖直心超詣
是謂頓門跋履造請一言元解始類顏子如愚以知十
俄比靜居默然於不二又以法惟無住化亦隨方嘗禪
誦於撫之西裡山又南至子虔之龔公山攫搏者馴悍
戾者仁瞻其儀相自用丕變刺史今河南尹裴公久於
稟奉多所信嚮由此定惠發其明誠大厯中尙書路冀
公之爲連帥也舟車旁午請居理所貞元二年成紀李
公以侍極司憲臨長是邦勤護法之誠承最後之說大

抵去三以就一捨權以趨寔示不遷不染之性無差別次第之門嘗曰佛不遠人卽心而證法無所着觸境皆如豈在多岐以泥學者故夸父喫垢求之愈踈而金剛醍醐正在方寸於是解其結發其覆如利刃之破骨索甘露之酒稠林隨其義味快得善利者可勝道哉化緣

既周跌坐報盡時貞元四年二月庚辰春秋八十夏臘六十前此以石門清曠之境爲晏然終焉之地忽謂入室弟子曰吾至二月當還爾其識之及是委化如合符節富夾鍾發生之候叶拘尸薪火之期緇素幼艾失聲望路渡涸流而法雨滂灑及山門而天香紛靄交感之際昧者不知沙門惠海智藏錫英志賢智通道悟懷暉惟寬智廣崇泰惠雲等體服其勞心通其教以爲吾師真性湛然與虛空俱唯是體魄化爲舍利則西方之故事傳焉不可已也乃率顧其徒從茶毗之法珠圓玉潔煜耀盈升建茲嚴事衆所瞻仰至七年而功用成竭誠信故緩也德輿往因稽首粗獲擊蒙雖飛鳥在空莫知近遠而法雲覆物已被清凉今茲銘表之事敢拒衆多之請銘曰

達摩心法南爲曹溪頓門巍巍振拔沉泥禪師宏之俾民不迷九江西部爲一都會亦既戾止元津橫需慈哀

攝護爲大法礪五滓六觸駭然相蒙直心道場決之則通隨器受益各見其巧真性無方知道不竭顧茲夢幻示有生滅微言密用煥如昭晰過去諸佛有修多羅心能悟之有一剎那何以真哀茲宰堵波

唐故寶應寺上座內道場臨壇大律師多寶塔

銘并序

京師東門二里所多寶塔者沙門靈湊等爲先大師薦社盡敬之地也大師諱圖敬姓陳氏河南陸渾人報年六十四經夏四十四以貞元八年春正月狀代入滅於保壽寺越十有五日遷窆于龍首北原距茲塔西北十餘步初大師入道依本縣思遠寺微公通法華經寶應二年制度編僧籍于東京長寺受具於白馬寺本律師曇無德義言下信解以爲遵道途而抵都邑涉門闕而躋堂皇故尸羅毗尼以攝妄想五部四分是爲肩鍵然後因定發惠最上乘優婆鞠多由是道也敷暢微妙攘除癡冥如一燈傳照一雨潤物宏我法者可勝道哉代宗朝徵入內道場累詔受興善安國寶應等寺綱首又充僧錄尋授寶壽寺上座賜律院以居授瑜珈灌頂密契之法講楞伽經起信論譯虛空藏經鑒義潤文世典羣書靡不該貫無非晏坐道場沃天心以了義照佛日

于中禁鬱爲龍象大拯斯人將滅之夕備申告誠中夜
累足如期順化其智惠歟其解脫歟法子苾芻服纓成
列仰護念慈哀之旨捨蓮花多寶之義厥後十五年而
功用成丹素軀稜石輪火齊施于外聖像真言多羅祇
夜函于內又以見湊公成就付囑而爲上首況不出戶
庭持經萬遍願力期滿嚴飾斯崇勒銘于茲以示塵劫
銘曰

三生不駐如電如瀑七情相攻如蠶如蝮彼上人者爲
世導師乃精毗尼以攝羣疑宏道日大化緣斯畢建茲
嚴事如地湧出國門之東萬寓來同斯爲寶所燭耀無
窮

唐大興善寺故大宏教大辯正三藏和尚影堂

碣銘 并序

三藏者何于心爲戒定慧于學爲經律論惟西域二大
士以正智法器爲天人師大宏教和尚本號金剛智南
印度人出家於那蘭陀寺道成于迦毗羅衛國事龍智
阿堵梨通密持灌頂之法入師子國登楞伽山航海涉
險聿來中土開元中隨鑾輅于兩都大智大慧皆握衣
請益春秋七十三夏臘五十化滅于洛京起塔于龍門
傳法於大辨正和尚和尚法號不空師子國人母氏方

振夢佛光照頂弱冠受具通三密法嘗資國信往詣他
方諷真言而海風恬息結秘印而狂象調伏若歲大旱
實作霖雨內出方袍之錫猶命服焉至德初宜皇受命
於靈翔譯不動尊經以獻凡所以順天心而導善氣者
又何可勝言自開元末至大歷中三朝尊奉以密行救
世代宗授以特進鴻臚卿賜號大廣智三藏既以衆生
病爲病于卧內加開府儀同三司封肅國公大歷九年
夏六月既望示滅于興善寺追命司空不視朝三日尊
名曰大辯正遣中謁者吊祠報年減先師三歲而休夏
同數初武皇帝崇大師以次公命卿也先師有儀同之
贈宏教之諡大師之弟子曰沙門含光曇貞覺超惠齡
於隣潛真惠覺等或爲肅宗灌頂阿堵梨清涼山功德
使或爲內道場三教大德或爲僧錄皆偉然龍象爲法
棟梁而惠應惠覺傳授秘藏永懷世道乃於仁祠法堂
嚴事華飾儀同在西肅國在東睟容德宇瞻仰如在應
公又推本其教曰昔毗盧遮那如來入不空王三昧說
瑜珈最上乘義授于普賢以平等性智而造妙覺一印
舍萬法五部周四方金剛之堅利蓮花之清靜悟入之
速可思議哉普賢授龍猛龍猛授龍智凡千百載而先
大師授于大師纂服六業之教紹明三摩之法攝護成

就斯爲妙門大凡翻經七十七部一百卷命書懸冊表章答禮傳譯之差次弟子之號名環周素壁聳觀生敬爭名會中亦參世典宏明集內無匪佛乘初先大師之滅也呂工部向杜衡公鴻漸爲之記大師之云亡也嚴京兆鄧沙門飛錫爲之碑感緣行化皆以詳熟今應公以二大師遺影之在此堂也不可以不識應公入大師之室德與入應公之藩以茲因緣俾揭文字銘曰
法身徧照六業傳妙惟二大師三朝演教天竺西極瑜珈度門連開法界月破重昏儼然衆設復獲親觀如聞軟語如結秘印一室之中寂然感通通行無窮法子之功

唐故東京安國寺契微和尚塔銘

并序

和尚俗姓權氏法諱契微天水畧陽人十代祖安邱敬公翼爲前秦僕射事備載記曾祖文誕皇銀青光祿大夫涪常二州刺史荊州都督府長史平涼郡開國公祖崇本皇朝散大夫滑州匡城縣令與兄戶部郎中崇基水部員外崇先皆以文學政事顯名于貞觀永徽之際考同光皇河南縣尉長安縣丞翰林詳定學士與伯兄益州成都縣尉無待仲兄欵桂梓三州刺史若訥三人同以大名舉進士擢第文章之美爲當時冠首然其世

德鍾慶若後無違者則有以清淨住世故和尚生而敏悟超然元覺九歲于薦福寺金剛三藏發心入易茶羅道場傳持聖印悟入之速發於岐嶷然其德容具舉家族敬異將必擇卿士之良者以嬪之時勇于出世至欲及其膚以自免翰林府君既捐館母兄竟不能抑遂以初笄之年被服紫褐至天寶元年始受具於福先寺定賓律師隸東京安國寺師事苾芻尼無勝受心門方便之學以爲心寔境化真由妄遣遣之而真亦隨盡化之而心乃湛然故外示律義內修禪說因初心而住實智離有相而證空法乃通四部經於宏正大師尤精楞伽之義而後住無住証洗六妄離二邊遵大道以坦蕩入法流而洄復以深惠善誘誨學徒或權或實爲歸爲趣亦猶淨名之隨機攝導蜀嚴以忠孝爲言故中外族姻徧沐其化漸漬饒益可勝道哉初以廣德中隨其家南渡安居于蘇州朱明寺以建中二年九月六日冥然化滅報年六十二經夏四十一弟子居惠操又其兄子也故探其義味最爲深入乃率籲緇俗號捧金身建塔于東武邱寺之東北崗從其教也姪孫德興以爲宣武有西方聖人之說東漢有浮圖仁祠之教以其教言之自菩薩提達摩七葉至大照祖師皆以心法秘印迭相

授受故戒生定定生惠得第一義者冲而詣之嗚呼今其詣之矣桑門紀述多不分系緒今備書者亦無忘先德故其文也繁銘曰

教旨清淨戒珠圓映識浪情塵還源返性彼一切見皆妄想生精修密詣湛爾融明示現者何此身非久強爲之銘以焯于後

興唐觀新鐘銘

并序

聲爲陽所以發越金尙羽所以清澈故覓氏工焉法器成焉元門揭焉與夫樂出虛鏗立就同其功用而信響受祉之說倍焉興唐觀新鐘者觀主道門威儀太清供奉邨尊師鑒素之所創也是觀經構之初與舊鐘俱當開元甲戌距今七十有七歲頃缺毀弃法音不嗣久矣師有環中大辯爲道流龜龍循其妙然後無爲而無不爲所以恢元功宏願力誠修而物應言發而響會上士仁人展其助飛廉回祿理其具精乎六齊合以萬數以心齊以神遇靈地嶺騰天光無害金無耗氣不宛不樛不石不播於是登簾在懸希聲殷然小大隨叩昏昕警衆周六虛而洞三界拔九幽而清五苦皇都人士游者萃者感於耳和於心躁者靜者懸解師之善利利物可勝道哉古者林鐘景鐘皆銘其功儒氏之典也推類以

鑲文字師之心也銘曰

其動也懸如天其用也虛而圓雷大音今集羣仙福元后今斯億年鏗訇響亮鴻都前上入冥今下澈泉然後春容銷散兮近萬物於自然

世德銘

肅肅我祖元鳥自天天乙革夏武丁相賢手文命子開國于權輿肇荒南荆瓜瓞綿綿爰暨周襄征伐下顧凌暴紛紛遇楚而顯羸吞四方我邦用遷乃宅隴坻乃封甘泉漢魏之際守相相繼或仁或哲亦夷亦惠圖謀藏蕤十有三世伊川其戎晉化爲東九州驅裂符有關中明明安邱濡跡匪躬二紀清夷明謨之功元魏以降苴茅繼封宜昌郾城仍世儀同洸洸平凉策勲于隨乃破公祚尅其枚迴運偶聖時土田載開仗節建旄自東徂西父子六人承家鍾慶百里同休南宮並命自時厥後德輝愈盛不享大官世名文行我曾王父弱歲觀光聲軼大學生登奉常偉節三虎聯華並芳翰苑春生士林風翔迨至王父保和居易人文獨步天爵自貴展禽下位賈生不試至今德聲尙聳清議郁郁世範先子承之大節明義人倫宗師行極忠孝道冥希夷卷舒無方焯燿當時曰予無狀亂歲而孤不知義方藐爾春愚亦既羈

賈甫習詩書以直爲師與時瘠疎琅琅清風嗽嗽土則及茲頑童是玷是辱聿修之戒大懼不克夙夜以思敢銘世德

幾銘

大和熙熙酌而用之旁魄變化皆生乎幾上合乾道萬物陰陽下爲人紀百工咸秩游泳虛無含體渾區乃卷乃舒與羣有俱冲用爲工方寸爲鑑周行不殆造物可俾一人制動寡以理衆或行其道或藏其用盤桓利貞得其大行燮贊裁成粲然文明舒亘八極藏之無形山川出雲元氣冥冥故曰知幾其神孔父用文去聖遠矣時無其人見幾而作造形斯悟遷生可卷顏子殆庶物至知之節宜好惡無愆五事無汨百度靜之如淵運之如環得喪糾纏相望其間不見朕莫知其然審而用之吾道常全

歲星居心贊 并序

興元紀號春三月司天氏奏歲星居心宿五度其色黃明潤大光澤帝位積五十餘日詔下有司臣謹按歲星五帝爲蒼五行爲木五常爲仁五事爲貌天意若曰時以至仁爲理覆露萬人浹洽生類則發于心緯形于古應陰陽大化昭報成功元符幽贊其昭昭如是禮運之

論聖人以日星爲紀以四時爲柄洪範之叙皇極曰飲時五福用敷錫厥庶人發于人格于天天人交感合若符節微臣伏于草茅之下沐浴仁聖敢獻歲星居心贊一章以脩周詩由庚由儀之關贊曰

皇矣上帝降鑒下人后王承之制作禮文又用清明家尚孝仁人無癘疵俗以阜蕃敷佑四方發爲天祥重華煌煌乃居明堂下煦仁澤上爲祥光回復感通天人攸同乃法五事乃建大中君君臣臣德輝昭融保佑命之自天無窮微臣作歌敢備唐風

二疎贊

靜專動直惟乾之德酌用不窮君子中庸矯矯二疎知微知終功成不居父子清風天子賜金羣公出祖都門之美焯映千古優游衡門棲息化源日飲醇酎心閑道尊人或言利和令智昏清行素風可貽子孫萬物營營吉凶和生環中之樞泊然遺形中林寂寥幽蘭自榮雖有煢繒不羈冥冥知止不殆古先炯戒賢哉大夫終始無悔

秘閣五絕圖賀監草書贊

季真造適揮翰晚壁酒仙逸態草聖絕跡興涵雲海詞韻金石傳于秘印永永無斁

無爲先生贊

至人無感與化升降全而不形保而不蕩泯然順物付之自當苟乖于是無非溺喪保合浩淳先生其人德機不發鳥獸同羣稽首元關清滌蒙昏笑而謂子道不遠身支離而全以靜爲君滑之則散泊之則存天性者名木伐蘭薰與時卷舒中若浮雲挈鼻絲夢無撓而真動而用斯至妙之門百昌皆化吾亦歸根動作天紀靜爲地文鳥行無章變化云云強名無爲以鏡心源

畫西方變贊

惟西方有極樂國以首楞嚴爲理其應薄其用神大抵揮萬緣羣動會於虛寂其次則感通信誓爲釐爲福局於世論者多置爲他方之教惟孝子信士仰爲冥助則像設之綵繪之用申罔極之報今茲西方變卽故戶部員外郎贈給事中范公之孤曰傳正傳質奉爲先妣博陵崔夫人旣練所畫也惟夫人以淑明柔順光配戶部自晝哭之後訓二孤之暇每讀誦大乘微言密詣精理今傳正等又能將順先旨發于孝思於精廬素壁合朱綠金翠之餘天人法相靡不嚴靜以夫人之福履孝子之至誠若乘念以游如經之旨當跌坐于芙渠上品之中生滅流妄於是昭息予嘗心奉其教故得贊其所以

然

畫釋迦如來贊

釋迦大聖以無礙應身演一切法後之人跡文字以爲象設誠明在中而福祉隨之伯舅武進縣丞府君守儒門言行之訓安貞下位其道未光貞元三年捐館舍太夫人從子于鍾陵承訃發哀茹終鮮之痛且痛不得當哭泣之位躬卽遠之事葺喪之禮有加等又曰悲哀鍾于情而不足以爲其助也乃稽諸釋氏說以爲幽贊交感之際不相遠也是徵景福以作繪事煥以金碧穆然尊嚴瞻仰之際如在佛刹况孝悌通乎神明聖功演乎無方小子德輿謹繫以贊

五色相宣今聖質昭明福祥下昭今保佑冥冥

續阿彌陀佛贊

十二因緣之中生死循環憂悲蘊聚夫非大聖以利又斷之慈航濟之則淪胥顛沒之不給矣惟阿彌陀佛化行西方其號極樂有生之乘念感化則游於斯今茲功德者清信士女隴西李氏爲亡夫襄陵尉榮陽鄭君再期之爲也女士歸鄭周一星而孀凡事舅姑以孝從婦奴以敬佐夫以義拊下以仁隱約終窶至于晝哭衛風碩人栢舟之詩實兼痛焉初鄭君旅人于晉因以靈仕

成命甫行祿未及而大病女士方侍姑于吳承訃加痛
宏誓徵福薦于冥冥紉針綴纈叶用五采青蓮白毫髮
鬚頰伸彼二大士列侍左右辟客文光炳耀煌煌發于
心成于手阿鞞跋致其遠乎哉鄭固善士妻又吾伯舅
之女子子也得周知之因以贊曰

西方大聖乘念則至寫彼相好導茲智氣冥助無方以
成鄭志

新刊權載之文集卷第二十八終

新刊權載之文集卷第二十九

唐權德輿字載之

諡冊文

諡議

奏議

德宗皇帝諡冊文

維承貞元年歲次乙酉月朔日孝孫嗣皇帝臣某伏惟
大行皇帝德合天地作人父母纂承光明建用皇極昔
在寶應制天下賦輿咸藩以大自魯疏雍師律既貞會
陝收洛克燁威命廓開王塗是登上嗣乃宅丕后服藝
祖神宗之大烈有軋軋翼翼之至敬敷佑迪哲尊嚴懿
恭燭明四極發育萬物濯沐乎仁澤澄清乎理本巍巍
乎建中風聲與貞觀符洎時有履診變生京轂省方展
義宏陰隲之功整旅致誅申振耀之令鳴誼滅息侯王
軌道丕冒持載鏡清砥平然後明禋志祀萬靈以接翕
受敷施九德咸事含宏亭毒以致其和博採虛受以通
其志政刑有箴宸展有銘煥乎文明之化成也因時創
節象卦設樂薰然中和之被物也納嘉言于近侍轅已
行之詔疾讓口于宵人有過誤之罪去徽號而約已正
廟祧而尊祖九譯通道萬方來庭賓旅焯乎勲緒夷歌

陳于樂府霜露所隊車書大同順氣旁達天休滋至慶
霄輪困德水清澈三辰秉陽以宣耀百嘉麗地而交感
飛走呈祥肖翹遂性在宥天下二十有七年夫文思光
被陶唐之盛也懜懜忠利虞帝之教也臺臺穆穆周文
之業也聰明神武漢祖之烈也躬古先之大烈極帝者
之上儀方將扈升介印侍檢玉牒奄遺未命永弃多方
億兆嗷嗷哀號靡訴顧惟冲昧懼忝孫謀君父有命付
茲神器虔恭貽訓感慕滋深今因山旣建同軌畢至一
二元老宗工碩生考稱天之禮稽節惠之法式遵古義
敢薦大名謹遣太尉某謹奉冊上尊謚曰神武孝文皇
帝廟曰德宗伏惟聖靈昭格膺是典禮叶贊丕祉流于
無窮嗚呼哀哉

莊憲皇后謚冊文 奉勅撰

維元和十一年歲次景申某月朔日哀子嗣皇帝臣某
伏惟大行皇太后柔明承天廣大法地齊二儀以發育
含萬物而化光靜專宅心謙儉約已塗山積厚淮水秉
靈四德交修六宮承式於德宗有逮事之孝敬於先皇
有輔佐之憂勤允迪風徽儀型天下伏以永貞誥命脫
躋宴區乃居太上之尊乃正中宮之位顧茲冲眇上荷
劬勞自幼逮長稟邑姜之教曷繼體纂圖申長信之供

養率用慈訓施于理道毋儀所被子惠所覃一紀于茲
萬方蒙福以載物之量苞逮下之仁嗣姪姒之徽音慕
黃老之清淨宜介丕祉盡如崗陵昊蒼不備艱棘俄及
追惟顧復創鉅感深銜血茹荼叩心罔極今酌偶即遠
龜筮告猶順厚夷體幽嚴就路宰政卿尹典禮之官詢
考古式詳稽謚法以周道章明未之或改形容擬議敢
易大名謹遣攝太尉中書侍郎平章事臣裴度奉冊上
尊謚曰莊憲皇后伏惟皇靈降格淑聖幽贊昭配清廟
對越鴻休與世世方祇永永無極嗚呼哀哉

故銀青光祿大夫尚書左僕射姑臧縣開國公
贈司空李公謚議

將仕郎守太常博士權德輿議曰李揆端莊粹溫潔廉
淑慎用文章術學資適逢時奮其英華以取貴達如良
庖投刃無復肯綮歷諫曹左史司王言貳春官以至于
平章大政在帝左右必以文誼藩身奉法遵職官曹無
訾政姻族無倖人束帶山立敷陳前志儼然而溫有碩
儒大臣之度或起或廢其道甚夷昔觀射父能作訓辭
以行事於諸侯左史倚相能道訓典以叙百物揆實有
之建中中西戎乞盟以舊齒宿望將命殊俗結華夷之
信董衣裘之會已事迴車歲當興元匪躬靡盬至河池

而致追錫司空恩禮有加按謚法曰率事以信曰恭不懈于位曰恭揆果行求已致位台司歷官陟降十有八次周旋敬慎以揚職業不曰率事以信乎及逾懸車之年奉絕域之使受命卽路視險若夷貞厲盡瘁復于左轂不曰不懈于位乎青韋元成翟方進以經明爲漢相而皆謚曰恭接揆所履節以一惠勤官死事炳然昭明有司易名請以恭謚謹議

故朝散大夫使持節常州諸軍事守常州刺史充本州團練守捉使賜紫金魚袋獨孤公諡

議

將仕郎守太常博士權德輿議曰獨孤及剛直方清根於性術其修身莅官確然處中立言遣辭有古風格辨論裁正昭德塞違潛波瀾而去流蕩得菁華而無枝葉其攝衣入室之徒皆足以掌贊書而秉方冊則及之爲文可徵矣其爲博士時有上議景皇帝不宜爲太祖者詔下庶官及舉夏殷周漢之故事尊祖配天之大旨以爲景皇始封于唐天所命也於是定議爲一代典法新平長公主之子裴傲尙永清公主欲以他族主婚及時相禮上陳不可竟得以裴僕射遵慶爲主當時稱之定呂誣盧奕郭知運之謚用禮文憲度得褒貶之正凡所

往復詞旨堅明其理舒州屬歲饑旱隣郡庸仁什四已上而舒人生悅在不知凶年優詔褒異就錫金紫其初治療其後在常皆因俗爲理人用愛戴雖不得居公卿長帥之任然其奉常議論三郡績用亦足以列于文苑附於循吏按謚法曰博聞多能曰憲薦可替否曰憲及的三王四代之典訓作爲文章以輔教化是謂博聞位衆中外必以稱職聞是爲多能定宗廟之實爲薦可正婚姻之主爲替否有司稽美行而易其名者請謚及曰憲謹議

昭陵寢宮奏議

右奉進止寢官在山上置來多年曾經野火燒蕪摧毀略盡其宮尋移在瑤臺寺左側今屬通年欲議修置緣舊宮本山上原無井泉每緣供水稍遠百姓非常勞弊今欲于見住行宮處修造所興久遠便人又爲改移舊制恐所未周宜令中書門下及百僚同商量可否聞奏

朝議郎守尙書司勳郎中知制誥雲騎尉賜緋魚袋臣權德輿議曰臣聞古宗廟之制前有廟廟列昭穆後有寢寢陳衣冠自秦漢以來始因陵立廟有寢宮便殿雖